

Ogni  
can  
mena la  
coa,  
ogni  
mona  
dise la  
soa

# Discursi da ostarìa

Carta  
canta,  
vilan  
dorme

Cuotidiano che vien fuora ogni tanto, che scolta, conta e smentisse tuto

DIREZION, REDAZION, AMINISTRAZION, STANPARÍA, VÈNDIA, LUOGO DE NÁSSITA, MAGAZIN: TUTO DA PESSATI



Mostra fotografica de scati d'autore

## I tesori della Terra

*Fotografie interessanti pa ricordarse come jerimo*

El Mestro Circolo Culturale Artico, co l'aiuto de ATHESIS el dedica na mostra de fotografia che la testimonia el periodo de la bonifica de le nostre tere, le xe sta fate 'ntè i ani 1920 e el 1940 dal Consorzio de bonifica de allora. El xe on rendere merito a la zènte che ga laora assè par metare in salvaguardia i nostri campi e i nostri paesi.. Ricordarse de quanta fadiga xe costà zerti lauri importanti come le bonifiche ne pole servire prima de desfarli o renderli inutili come continuemo a fare co i fossi. Xe possibile visitare la mostra a partire dall'inaugurazione de sabo 21 dizènbre fin a dopo la vecia, quando che xe verta l'Ostaria.

## L'Ostaria

So la vita de on omo  
che'l sia on omo  
ghe xe senpre  
almanco na ostarìa.

El Mestro

## Dedicà a Walterin la Multisalapolifunzionale

*Na serata che ga scaldà el cuore*

Francesco Chiapperin

La sera del 25 de ottobre "el Mestro Circolo Culturale Artico" gà organizà "on venare dedicà a Walter". La xe sta 'na ocasion pa stare in compagnia come ca femo noantri da Pessati, co tanta musica, tanto teatro, calche ombra de vin e la gioia de stare insieme co on scherzo, na batuta e senpre col sorriso so la boca. Ghemo scumizià la serata co la cerimonia ufficiale co la quale xe sta intitolà la nostra sala a Walter Barin. Parchè volemo che el resta indimenticabile a Tuti, no solo ai amighi ma anca a quei che no ghe xe sta dà la fortuna de conossarlo e de godarse a starghe insieme. Parchè el xe sta uno che ga dà tanto de la so vita a chealtri e el xe una de le persone degne de no esare desmentegà. E po' penseghe a quanto belo che xe catarse come "El Mestro Circolo Culturale Artico" in te la "Walter Barin Multisalapolifunzionale" In bona sostanza queste xe le rason de la dedica a Walter. La serata la xe 'nda avanti co l'artista Gino Pici che co la so fisarmonica ne ga ricordà le so bele interpretazione anche co grandi artisti. Davide Polato Andretz, cantautore de casa, el ga sonà de le canzon nuove, del so CD "on tramonto da noare" e interpretà brani de Fabrizio de Andrè. Marieto Marone co le so barzelete, poesie e storie el xe sta aplaudio come na star. El finale xe sta na gran sorpresa, l'Inno a Suisin in prima assoluta, rangià su da Massimo Basan, co parole e musica de Tomaso. Na Gran Figada...

## Postarse non Pojarse

## Lo ghetto el Profilo

Tomaso

Rivare a la me età e sentirme dire ca no so postà, me vien on poco de nervoso.

Ma come ! Sa so maridà da quarant'ani co la me prima femena, a go du tusi e tri neudi co on coriccolo de tuto rispetto, co vago in piazza me saluda tutti e ala fine i me dise anca ca so senza profilo. .... Ahhh Benon.

Dedicà a Suisin

## Ciao Ciao Suisin

Testo e Musica de Tomaso

*In quasi tute la canzon del mondo  
Le parla de 'ndar via e vegner sù  
De la malinconia che vien dal fondo  
O de l'amore che no xe vegnù*

*Voria na volta tanto rabaltare  
Ste fole che ne fa solo star male  
Me passa par la testa on pensierin  
Parchè no far canta so Suisin*

*No l'è cussita grande el me paese  
In quatro salti te lo giri a fondo  
No xe chel gabia po' tante pretese  
Però l'è conossio in tuto el Mondo*

*No ghe xe mai stà principi o marchisi  
No ghe xe vile vecie e gnan musei  
Ma el ga passà so a pele tante crisi  
Pagando de scarsela co i so schei*

*La Ciesa el Municipio el Canpanile  
Le xe le robe che ne xe sta dà  
Piazzette scuole vecie col cortile  
Xe li a testimoniare la nostra identità*

*La qualità pì grande de Suisin  
Senza far tanti sforzi de la mente  
La sa oramai anche on putin  
La xe la testa dura de la so zente*

*Ciao Ciao Suisin mi no vago via  
Ciao Ciao Suisin voio resta qua  
Ciao Ciao Suisin la to fantasia  
Ciao Ciao Suisin Grande e Picenin*

## Co le canzon de i ani 60

## A Volte i torna indrio

... e i fa paura

La talpa

El podaria essere on scup

No so se i ghe la farà a fare queo che se sente dire in ostarìa. No, no ste pensare ala politica parchè la xe za intrigà par conto suo. Mi a me riferisso ai resti de on "complesso" che i se ga messo da nuovo insieme a strinpelare sue chitare, sonare sua pianola e a batate i tamburi. "Gli Antenati" i ga pensà de ripetare l'esperienza par "tentare" de sonare ancora anche se manca do elementi del gruppo originario: el Mestro e Walter.

Risulta che i se cata tuti i marti de sera in te la ex sala da balo de Suisin (l'Arena), dopo zena, a provare le canzonete che i sonava ai so tempi e siccome che no i xe pi tusiti, qualche problema ghe xe co queo che canta, la ose, no a xe pi quea de na volta e anca quei che sona no i xe pi gajardi come che i jera in ti ani 60. L'età, la gà senpre rason e prima de sonare te i senti: oi oi de chi, ai ai de là; e dopo on quarto de ora de lamenti i scumizzia a strinpelare. Ai go sentii sonare qualche canzon e la ghe vien ben na volta si e tre manco, disemo cussi. Queo che pi te cava el cuore xe, che i continua co tanto impegno che saria on pecà no poderli sentire. Da ciacole de ostarìa, pare che ghe sia dei movimenti in ato e che "la comission" del Mestro Circolo Qulturale Artico, sia in contato par fare na serata in ricordo dei bei tempi, quando che se gavea manco de 'ndare in bagno, se parlava de morose e de projeti da grandi. Adesso ca semo n'da vantì co l'età e che no se parla pi de morose ma de prostata e se vive de ricordi a spera-

ria che sti tusi podesse esibirse, anca parchè ghe xe na voia mata, da parte dea vecia compagnia, de incorajare i musicisti co el lancio de fruta fresca e verdura de stajon.



Gli Antenati